

Dapli guardias – administraziun sutminescha la decisiun

Pauca enclatga per las miserias dals chantuns da cunfins

CUN STEFAN ENGLER
HA DISCURRÌ CLAUDIA CADRUVI / ANR

■ **Adumbatten insistan Stefan Engler e Beat Rieder sin dapli guardias als cunfins – sco lur chantuns giavischan. Ma la chombra pitschna ha scrit giu ier las duas iniziativas dal Grischun e dal Vallais per in rinforzament als cunfins. Davos aura planisescha l'administraziun federala para da sutminar la decisiun dal parlament da stgaffir 44 novas plazzas en ils corps da la guardia-cunfin.**

Essas Vos trumpà che la chombra pitschna ha scrit giu las iniziativas e fa uschia sco sch'il giavisch dal Vallais e dal Grischun fiss adempli?

Stefan Engler: Jau sun dal maini che las pretensiuns da questas iniziativas – ellas èn vegnidas lubidas dad omaduas chombras – n'èn betg ademplidas. La cumissiun è da l'avis che tut saja en urden e sin buna via. Jau hai dubis ch'igl è uschia.

L'enviern ha il parlament decidì cun il preventiv 44 plazzas supplementaras per la guardia-cunfin. Vos avais exprimì dubis che questas plazzas vegnan insumma occupadas.

L'administraziun ed il cussegl federal lessan realisar il «DaziT». Igl è in grond program per nizzegiar las pussaivladads da la digitalisaziun per il dazi. Quai ha consequenzas era per la guardia-cunfin e mida la funcziun ed il profil da las guardias.

Less la confederaziun pia proteger ils cunfins a moda digitala e betg pli cun guardias realas?



Cusseglial dals chantuns Stefan Engler (pcd GR) ha defendì ier adumbatten per l'iniziativa che vuleva in rinforzament als cunfins. MAD

Para ch'ins vesa grondas schanzas da pudair remplazzar las guardias cun dronas u cun auters meds digitalas.

Durant la debatta avais Vos avertì ch'ins vegnia a sfruschar ils egl e sa

smirvegliar cura ch'il program è realisà. Pertge?

Igl è – per dir uschia – ina fitg gronda chista cun grondas pretensiuns. Ins spetga bler da quest project. Ma igl è

anc pauc concret avant maun. Ins na sa anc betg tge consequenzas ch'i ha per la segirtad als cunfins.

E co statti cun las 44 plazzas supplementaras per la guardia-cunfin ch'il

parlament ha decidì en il preventiv? Cumenzan ins a recrutar e scolar gliud? U vul ins engaschar persunal dal dazi nua ch'ins bajegia giu plazzas?

Quai è il plan da l'administraziun.

En sazez èsi ina cugliunaria.

Tenor mai na prendan ins betg serius il parlament ch'ha prendì decisiuns. Ed ins na prenda betg serius las iniziativas chantunalas ch'han demussà in basegn da segirezza en ils chantuns. Ins sa fida uss da tschertas ipotesas e ch'il problem sa regleschia da sazez en tschintg u sis onns entras il program «DaziT».

Voss collega vallesan Beat Rieder ha appellà ensemen cun Vos da tegnair ferm a las duas iniziativas chantunalas per rinforzar la guardia-cunfin.

Gea, pertge la guardia da cunfin ha era funcziuns da polizia e lavura ensemen cun las polizias chantunalas. Da spetgar che persunas dal dazi ch'han lavurà fin uss adina en l'administraziun vegnan ad avair las medemas capacitads sco in guardia-cunfin, vi da quai na crai jau betg.

Beat Rieder fa part da la cumissiun da gestiun ed ha constatà ch'ils programs dad IT necessaris n'èn anc ditg betg avanzads avunda per porscher soluziuns.

Gliez na poss jau betg giuditgar, pertge jau n'enconusch betg ils projects en detagl. Las experientschas cun da quests gronds projects n'èn dentant betg uschè bunas.